

**Uunga siunnersuut: Kommunalbestyrelsiniut, nunaqarfinni aqutsisunut
ilagiillu sinnisaannut qinersisarnerit pillugit
Inatsisartut inatsisaat nr. x, xx.xx 2012-imeersoq**

pillugu

Inatsisinut Ataatsimiititaliap

ISUMALIUTISSIISUTAA

Siunnersuutip aappassaaneerneqarnerani saqqummiunneqartoq

Suliarinninnermini Inatsisinut Ataatsimiititaliaq ukuninnga inuttaqarpoq:

Inatsisartunut ilaasortaq Isak Hammond, Inuit Ataqatigiit, siulittaasoq
Inatsisartunut ilaasortaq Justus Hansen, Demokraatit, siulittaasup tullia
Inatsisartunut ilaasortaq Doris Jakobsen, Siumut
Inatsisartunut ilaasortaq Kristian Jeremiassen, Siumut
Inatsisartunut ilaasortaq Juliane Henningsen, Inuit Ataqatigiit
Inatsisartunut ilaasortaq Harald Bianco, Inuit Ataqatigiit

1. Siunnersuutip imarisaa

Inatsisisatut siunnersuutip pingarnertut sammisai nassuaatitaani nalinginnaasuni imm. 2.2-mi nassuaatigineqarput.

2. Paassisutissat ataatsimiititaliap inatsisisatut siunnersummik suliarinninnerani ilanngussat

Siunnersuut tusarniaassutigineqarsimavoq. Piffissap tusarniaaffissatut killiliussap qaangiunne-rani, Kanukokamit kommuninillu tusarniaanermiit akissutinik Naalakkersuisut tigusaqarsi-mannillat, pissutsit arlallit siunnersuummut pingaarutillit eqqartuiffiginissaannut suli piffis-samik pisariaqartitsisoqarmat. Kanukokamit kommuninillu tusarniaanermiit akissutinik arla-linnik Inatsisinut Ataatsimiititaliaq tamatuma kingorna tigusaqarpoq.

Aammattaaq Kanukoka ataatsimiititaliamut sassartinneqarsimavoq.

Kanukokamit kommuninillu isummat saqqummiunneqartut eqikkernerinik Naalakkersuisut allakkiatigut Inatsisinut Ataatsimiititaliamit nassinneqarput, Naalakkersuisullu taakku pillugit oqaasaqaateqarnissaannik qinnuteqarfugalugit. Allakkiaq Naalakkersuisullu akissuteqaataat isumaliutissiisummut uunga ilanngussatut 1-itut 2-tullu ikkunneqarput.

3. Inatsisinut Ataatsimiititaliap oqaaseqaatai

Ajornartorsiutit, Kanukokamit kommuninillu, kiisalu Naalakkersuisut saqqummiussissutaani, qaqinneqartut arallit, Inatsinut Ataatsimiititaliap malittuani samminiarpai.

3.1. Kommunimut qinersisinnaatitaanerup killilerneqarnera.

Danmarkimi innuttaasuseqanngitsunut kommuninut qinersisinnaanerinut piumasaqaataasut siunnersuutikkut sukannererulersinneqarput.

Innuttaasut Danmarkimi innuttaasuseqanngitsut maani najugaqartut naalagaaffiup iluani ukiuni pingasuni najugaqareersimagunik, qinersinissaq minnerpaamik qaammatit arfinillit sioqqullugit nunatsinni aalajangersimasumik najugaqarsimagunik, maleruagassat maannamat atuuttut malillugit kommuninut qinersisinnaatitaapput.

Nunani avannarlerni innuttaassuseqartunut tunngatillugu, qinersinissaq sioqqullugu minnerpaamik ukiuni pingasuni nunatsinni aalajangersimasumik ataannartumillu najugaqarsimanisamik piumasaqaatitaqarnermigut siunnersuut sukaterinermik nassataqarpoq.

Nunani avannarlerni innuttaassuseqanngitsut, qanorluunniit sivisutigisumik nunatsinni najugaqarsimagaluarunik, siunnersuut aqqutigalugu kommuninut qinersisinnaatitaanissamut mat-tunneqarluinnarput.

Sanaartornissamut ukiuni arlalinni ingerlanneqartussamut atatillugu nunanit allanit amerla-soorsuullutik suliartorlutik nunamut maanga nuullutik tikerartussanut naleqqiullutik innuttaasut najugaqavissut ikinnerussuteqaleratarsinnaanerat pinaveersaartinniarlugu inatsisip nas-suaatitai malillugit sukaterinissaq siunnersummi siunertaavoq. Maannakkut nunatsinni inuit kommuninut qinersisinnaatitaasut 44.000-it missilioraat inatsisip nassuaatitaani paassisutisiissutigineqarpoq, piumasaqaatilli sukaternissaat Naalakkersuisunit pisariaqartutut nalilerneqarpoq.

Siunnersuutip taamatut iluseqarluni inunnut Danmarkimi innuttaasuseqanngitsunut, ukiunili arlaqartuni nunatsinni najugaqarsimasunut, nunamullu ilisimasanik, sulinermik akileraarutinllu tunniussisimasunut naammaginanngitsumik sunniuteqarnera, Kanukokamit tassunga tunngatillugu oqaatigineqarpoq. Taakku inuit qinersisinnaatitaanertik annaasavaat. Siunnersuut nunat avannarliruit akornanni ileqqusumik atorunnaartitsisutut Kanukokap tungaanit aamma tikkuarneqarpoq, tassami nunani avannarlerni innuttaasut nunani avannarlerni allani sivisuumik najugaqarsimanissamik piumasaqaatitaqanngitsumik nunani avannarlerni kommuninut qinersisinnaatitaapput. Taamaammat siunnersuutip siunertaa allatut iliorluni anguniarneqarnissaa Kanukokamit kaammattuutigineqarpoq.

Europamiut isumaqatigiissutaat (Den Europæiske konvention) 5. februar 1992-imeersoq nunani allamiut naalakkersuinikkut najukkami suliaqarsinnaanerannut atatillugu, naalagaaffit akuersisut nunanut allamiunut tunngatillugu, pineqartorlu qinersinissaq sioqqullugu ukiuni tallimani inatsisit naapertorlugit nunami najugaqarsimappat sumiiffimmi nunaqqavissut nali-galugit qinersisinnaatitaanermut qinigassangortissinnaanermullu pisinnaatitaaffilissallugit najukkami oqartussaasut pisussaaffilerpai. Isumaqatigiissut pineqartoq Danmarkimit akuersisutigineqarnikuovoq, kisianni nunatsinnut tunngatillugu nanganartoqartillugu. Inatsisartut isumaqatigiissummik saqqummiussivigineqarnikuunngillat, taamaattumillu nunatta qanoq annertutigisumik akuutinneqarnissanik isummernissamut periarfissaqarsimanatik.

Isumaqatigiissut – soorlu aamma Europami naalagaaffit akornanni inuit pisinnaatitaaffii pil-lugit isumaqatigiissut (Den Europæiske menneskerettighedscommission) taamaattoq – Euro-parådikkoorlugu tamat oqartussaaqataanerat inuit pisinnaatitaaffiilu siuarsarniarlugit sorsun-nersuup kingulliup kingorna isumaqatigiissusiaavoq.

Inatsisissatut siunnersuut taamatut iluseqarluni akuerineqassappat, nunarput isumaqatigiis-summut ilaatinneqarnissamut mattunneqassaaq. Akerlinganilli nunani avannarlerni innuttaasuseqanngitsunut taamaallaat qinersinissaq sioqqullugu ukiuni tallimani aalajangersimasumik ataannartumillu nunatsinni najugaqarsimanissamik piumasaqaateqarnermik sukaterineq taa-mallaat kinguneqassappat, tamanna atutissanngilaq.

Inatsisiniut Ataatsimiititaliaq tamanna aallaavigalugu, Nuummi saviminissarsiorfimmik pilersitseratarsinnaanermut atatillugu sanaartornissap Maniitsumilu aluminiummimik aatsiterivis-samik pilersitseratarsinnaanermut atatillugu sanaartornissap, ukiut tallimat sinningaatsiarlugit ingerlanissaat Naalakkersuisunit naatsorsuutigineqarnersoq, Naalakkersuisunut apeqquteqaa-teqarpoq, taamaannngippallu siunertamut Naalakkersuisunit erseqqissarneqartumut kiisalu inu-it ukiuni amerlasuuni najukkami innuttaaqataasimasut tamat oqartussaaqataanerannut peqataanissaannut mattussinnginnissamik iluaquisiisussamik, ukiunik tallimanik piumasaqaateqar-neq oqimaaqatigiissaakkamik iluarsiissutit Naalakkersuisunit isigineqarnersoq.

Apeqqutinut 9-mut 10-mullu Naalakkersuisunit akissuteqaatit Inatsisiniut Ataatsimiititaliamit innersuussutigineqarput, innuttaasunut nunanit avannarlerninngaaniinngitsunut ukiuni tallimani atasuinnarmik najugaqarsimanissamik piumasaqarneq, siunnersuutip siunertaanik angusa-qarnissamut naammannersut nalilissallugu Naalakkersuisut naammattunik misilittagaqanngitsut, ilaatigut tassani erserpoq. Sanaartornermi nunanit allanit suleqataasut qanoq amerlatigisut kingorna ingerlatsinermi ingerlaqqiinnassanersut, Naalakkersuisunit nalinerneqarsinnaanngilaq.

Tamatumunnga atatillugu ataatsimiititaliap oqaatigissavaa “Kalaallit Nunaanni ingerlatassanik annertuunik piviusunngortitsinissamut sinaakkutissatut atugassarititaasut pillugit nassuaammi” (UPA 2012/50) ersermat, suliassat marluusut (Nuummi saviminissarsiorfissap Maniitsumilu aluminiliqfissap) ataatsikkut sanaartorneqarnerisigut suliffissanik 4.700-ut pallillugit amerlassusilinnik tapiisuteqarnissaat, ingerlatsinerullu nalaani suliffiit 1650-it missaaniissasut ilimanartoq. Saviminissarsiorfissamik sanaartornerup ukiunik pingasunik, kiisalu aluminiliqfissamik sanaartornerup ukiut tallimat - arfineq marlullu akornanni sivissussuseqarnissa naatsorsuutigineqarpoq. Sanaartornerup nalaani sulisussanik naammattumik piginnaasalinnik annertuumik amigaateqartoqassaaq. Amigaateqarneq, sulisussanik amerluunik avataaneersunik atuinissamik pisariaqalersitsisussaq. Tamatuma akerlianik ingerlatsinermi amigaateqarneq annikinnerussaaq. Taamaattorli piffissami qanoq sivisutiginersumi sulisunik avataaneersunik atuinissaq pinngitsoorneqarsinnaassanngilaq.

Ingerlaatsinerup nalaani Nuummi Maniitsumilu sulisut pingajorarterutaat kalaallinik inutta-lerneqarpata, pilersaarutini marluusuni avataanit suliartortut inuit 1.100-ut missaannik taa-mallaat amerlassuseqassapput. Tamanna Kommuneqarfik Sermersuumi qinersisinnaasunut 16.000-it missaannik amerlassusilinnut Qeqqatalu kommuniani qinersisinnaasunut 7.000-it missaanni amerlassusilinnut naleqqiullugu isigineqassaaq.

Nunani avannarlerni innuttaassuseqanngitsunik maani najugalinnik kommunimut qinersisin-naatitaanerannik atorunnaarsitsinermik (amma nunani avannarlerni innuttaassuseqartunik danskiunngitsunik kommunimut qinersisinnaanermik killiliinermik) oqaatigineqareersutut najugaqavissut, nunanit allanit suliartorlutik nuuttunut naleqqiullutik, ikinnerussuteqalernissaasa pinaveersaartinneqarnissa Naalakkersuisunit siunertarineqarpoq, inatsisisssatut siunner-suutip nassuaatitaani nalinginnaasuni imm. 2.2. malugiuk:

“Sumiiffinni innuttaasut nunanit allanit suliartorlutik annertunerusumik nuuttoqar-neratigut ikinnerussuteqalersinnaassannginnera qinersisinnaanermi piumasaqaati-nik sukannernerulersinermik siunnersuuteqarnikkut anguniarneqarpoq. Assersuu-tigineqarsinnaavoq Nuummi saviminiliassamik piiiaffeqalissappat, Maniitsumi alu-miniumimik aatsitsiviliorqassappat imaluunniit nunatta avannaani uuliasiornermik suliaqartoqarnerani. Assigisaanik suliaqartoqarneratigut sanaartornikkut suliaqar-nerit siunissami ukiunik arlapissuarnik sivisussuseqarnissa ilimagisariaqarpoq..”

Suliniutinut marluusunut avataanit tikisitanik sulisussanik atorfissaqartitsinerup Naalakkersui-sunit nassuaatigineqarnera naapertorlugu, nunanit avannarlerneersuunngitsunut ukiuni talli-mani atasuinnarmik najugaqarsimanissamik piumasaqaat equnneqassappat, imak annertuti-gissangilaq najugaqavissut communalbestyrelsintut qinersinermi ikinnerussuteqalersinnaallu-

tik. Tassami taamatut piumasaqaateqartoqanngikkaluarpalluunniit, innuttaasut najugaqvissut ikinnerussuteqalernissamut ulorianartorsiornersut apeqquaavoq.

Tassunga ilaavoq, suliassani angisoorsuarni illuliortiterneq sanaartornerlu pillugit Inatsisartut inatsisaattut siunnersuummi (UKA 2012/110) inatsisip nassuaatitaani ima allassimavoq:

Nunani allamioq Kalaallit Nunaanni ukiuni arfineq marlunni inatsisit naapertorlugit najugaqarsimappat, piffissamilu pineqartumi tamarmiusumi sulineq inuussutissarsiornerlu pissutigalugit najugaqarnissamut akuersissummik peqarsimalluni, tak. nunani allamiut pillugit inatsimmi Kalaallit Nunaannut atuuttumi § 9, imm. 2, nr.3, suleriaaseq aallaavigalugu nunani allamioq [nunani allamiut pillugit inatsimmi Kalaallit Nunaannut atuuttumi] § 11, imm. 4 naapertorlugu ataavartumik najugaqarnissamut akuersissummik angusaqarsinnaavoq. Najugaqarnissamut akuersissummum tunngaviusoq ukiuni arfineq marlunni tamarmiusuni pingarnerusutigut allangor-simassangilaq, soorlu aamma piffissami killiligaanngitsumik najugaqarnissamut akuersissummik pissarsinissamut piumasaqaatit sinneri eqqortinneqarsimasussasut.

Suleriaatsip immikkut ittup tamatuma nunani allamiunut suliniummi angisuumi sanaartornerup nalaani sulilernerut atatillugu najugaqarnissamut akuersisummik tunineqartunut atuunnissaa siunertaanngilaq. Pineqartoq tassaassaaq najugaqarneq, suliniummi angisuumi sanaartornerup nalaanut piffissap tungaatigut killilersimaneqartoq. Nunani allamiut ataasiakkaat Kalaallit Nunaanni ataavartumik najugaqarnissartik anguniarlugu Kalaallit Nunaannukartarnissaat siunertaanngilaq. Siunniunneqartutut najugaqarnerat najugaqarnerugallarnertut issaaq. Suliniutinut tamakkununnga sanaartornerit ingerlanneranni ukiunik marlunniit tallimanut sivisussuseqartuni paarlakaajaannermik aaqqissuussinernut atatillugu qaammatinik 6-12-inik sivisussusilimmik najugaqartarnerit pineqarput. Tamatuma pisutigisaata assigisaanik pissuteqarluni taamatut najugaqarnissamik akuersissut katissimasanut meeqqanillu ilaqtariittut kattussisoqarsinnaanngilaq. (Ataatsimii-titaliap erseqqissaataa)

Paasissutissat taakku ilumoorpata, nunatsinni suliassani annertuuni sulisorineqartut nunani avannarlerni innuttaassuseqanngitsut, ullumikkut maleruagassat atuuttut malillugit nalingin-naasumik kommunimut qinersisinnaanissaminut periarfissaqanngereerput. Tassami nunani avannarlerni innuttaasuseqanngitsut **Naalagaaffimmik minnerpaamik ukiuni pingasuni aalajangersimasumik najugaqarsimagunik, qinersinissarlu sioqqullugu qaammatini arfinilinni nunatsinni aalajangersimasumik najugaqarsimagunik** aatsaat kommunimut qinersi-sinnaatitaaneq angussavaat.

Kommuninut qinersisinnaanermut piumasaqaatinik atuuttunik sukaterinissaq ilumut pisariaqartinneqarnersoq, tamakku tunuliaqtaralugit qularnartutut isikkoqarpooq.

Naalakkersuisut siunnersuutaat allanngortinnagu akuersissutigineqassappat, angutip arnarluunniit nunat avannarliit arlaanni innuttaassuseqannngitsup nunatsinni najugaqalersimasup, inuaqatigiinnullu akuulersimasup, nunamilu maani inuusunik perortunillu qitornallip, qinersisinnaatitaanini annaassavaa najukkamilu akuuffigisamini, tamat oqartussaaqataaneranni pisinnaatitaaffeqaleqinngisaannassalluni.

Innutaaqataalersut nutaat piffissami aalajangersimasumi nunami najugaqareersut najukkami tamat oqartussaaqataanerannut akuutinnejnarneri, namminermuinnaanngitsoq aammali inuaqatigiinnut nalituujusinnaavoq. Naleqqussarnissamut inuaqatigiinnullu akuulernissamut – inuaqatigiinni akuuffigilikkan akisussaaqataanermik tigusinissamut kaammattuutitut isigineqarsinnaavoq. Soorlu tamanna inuaqatigiinni pisinnaatitaaffilinnut A-nut, kiisalu killilimmik pisinnaatitaaffilinnut B-nut, aggornilinnik innuttaqartuni takuneqartartoq, inuttut atukkat naliqinnginnerisa nassatarisaanik saqitsattoqalersinnaaneranut pinaveersaatitut aamma isigineqarsinnaavoq.

Inuaqatigiit innuttaasunut nutaanut ammaassineri; inuit avataaneersut nunatsinni akuulersinissaat unammillernartoqartuassaaq, amerlassutsimikkut kalaallit sungiusimasaannit allarluunnaaneri nunaniillu amerlasuutigut uagut kulturitsinnit allaanerulluinnartumik kulturililinnik, sulisussanik eqquissuinerup ajornartorsiutit nassatarisassai ataatsimiititaliap tappiiffinginngilai.

Taamaattorli inuit tamat oqartussaaqataanerannik annikillisaaniarluni alloriarnerit tamarmik, mianersorluunnarluni tunuarsimaarlunilu alloriutigisariaqarput.

Kommuninut qinersisinnaanerup annikillisarnissaanik siunnersuutip ataatsimiititaliaq assorsuaq isumaliutissippaa.

Qinersisinnaatitaanermut piumasaqaatit ullumikkut atuuttut ingerlatiinnarneqarnissaat, ataatsimiititaliap isumaqatigiittup kissaatigaa. Ataatsimiititaliaq tamanna naapertorlugu allannguutissatut siunnersuummik saqqummiussivoq.

3.2. Sumiiffiit sinniisuutitaqartinneqarnerat.

Ikaarsaariarnermi nunami sumiiffiup sinniisaatut kommunalbestyrelsinit ilaasortaatitaqarnermik aaqqissuussaq inatsisisstatut siunnersuummi ingerlateqqinnejnqarpooq. Taamaasilluni kommuuniusimasut tamarmik minnerpaamik ataatsimik nunami sumiiffiup sinniisaatut kommunalbestyrelsimi ilaasortaatitaqassasut, inatsisisstatut siunnersuummi § 45, imm. 4-ami aalajangaavoq. Qinigassanngortittoq partiimit/qinigassanngorteqatigiinnit anginerpaameersoq

amerlanerpaanik qinerneqarsimasoq kommuniusimasumit sumiiffiup sinnisaatut inissinneqassaaq (tamanna qinigassanngortittoq attaviitsoq partiit qinigassanngorteqatigiilluunniit qinersisaannit amerlanerusunik qinersiseqarsimanngippat). Kommuniusimasuni sumiiffiup sinnisaatut inissinneqartussaq qinigassanngortittut allattorsimaffianni ilaassaaq, kommuniusimasilu aalajangersimasumik najugaqassalluni. Kommuniusimasumi sumiiffiup sinnisaatut kommunalbestyrelsimit ilaasortaasoq, kommuniusimasumit allamut nuunnermigut, tamanna borgmesteritut borgmesterilluunniit tulliatut atuuffimmut nuunneq siunertaqanngippat, qingaasinnaasutsini annaassavaa, inatsisissatut siunnersuummi §§ 55-56 naapertorlugit.

Sumiiffiup sinnisaatut ilaasortaatisisarermik aaqqissuussinerup ingerlatiinnarneqarnissaa, Qaasuitsup Kommuniani komunalbestyrelsimit Kommuneqarfik Sermersuumilu komunalbestyrelsimit kissaatigineqanngilaq. Aaqqissuussineq kommuniusimasuni piviusut tunngavigalugit naalakkersuinikkut tamallu oqartussaaqataanerannut annertusaasimanngitsutut Kommuneqarfik Sermersuumi komunalbestyrelsimit nalilerneqarpoq. Aaqqissuussinerli attatiinnarneqassappat pinngitsoorani najugaqartussaatitaanermik piumasaqaateqarnerup atorunnaarsinneqarnissaa komunalbestyrelsimit kissaatigineqarpoq, qinikkanik najukkamut pituttuinerup sumut iluaqutaanera komunalbestyrelsimit takujuminaatsinneqarmat, aaqqissuussaanikkullu iluarsartusseqqinnermi najugaqarnissamut piumasaqaat komunalbestyrelsimit siunertaasumut akerliusutut isigineqarmat: kommunit (kommunerujussuit) nutaat ataasiusutut saqqummertarnissaannut atatillugu. Sumiiffiup sinnisaanik aaqqissuussineq ingerlateqqinnejassappat, kommuninut pituttuisariaqannginnissaa, Kommune Kujallermi amerlane-russuteqartunit isumaqarfigineqarpoq. Naalakkersuinikkut suliaqartumik illoqarfiit aallartitarnerannut sumiiffiup sinnisuanik aaqqissuussineq isumannaarinnituusoq, taamaalillutik innuttaasut najukkami komunalbestyrelsimit ilaasortamik naapitsinissamut periarfissaqarlutik, Qeqqata Kommunianit paasissutissiissutigineqarpoq. Siunertanilli atuuffinnillu ersaris-saanissaq kommunimit maqaasineqarsimavoq.

Kommunit oqariartuutaat innersuusutigalugit sumiiffiup sinnisaannik ilaasortaataqartarnermik aaqqissuussinerup ingerlateqqinnejannginnissaa Kanukokap innersuussutigisinnaan-ngikka, Kanukokamit nalunaarutigineqarpoq.

Kommunerujussuarni nutaani kommuniusimasut annertunerusumik sunniuteqalernissaannut allatut annerusumik iluaqsiinani - aaqqissuussaanermik iluarsartusseqqinnermi siunertari-neqartunut aaqqissuussineq naapertuutinngitsutut, kommunerujussuullu ataasiunissaanik kis-saateqarnermut akerliususutut, tassunga atatillugu Kanukokamit tikkuarneqarpoq. Najukkamit aallartitaq ataaseq arlallilluunniit ikitsoralaannguanik qinersiseqartillugit, tamat oqartus-saaqataaneranni akerleriinnernik pilersitseqqajaasartoq, taamaalillunilu komunalbestyrelsip katitigaanerata kommunerujussuarmi naalakkersuinikkut pissaanerup inisisimaneranik takutitsiuunngitsuusoq, Kanukokamit aamma tikkuarneqarpoq.

Taamaattorli sumiiffiup sinniisoqarnermik aaqqissuussineq attatiinnarneqassappat, najugaqartussaatitaanermik piumasaqaateqarnerup atorunnaarsinnejarnissaanik Kommuneqarfik Sermersumit kaammattuuteqarneq, taamattaaq aaqqissuussap siunertaanik sumiiffimillu aallartitat atuuffiinik erseqqissaanissamik Qeqqata kommuniata kaammattuutaa Kanukokamit taperserneqarpoq.

Inatsisinut Ataatsimiititaliap Kanukokap kommunillu isummersuutaannut qulaani taaneqartunut Naalakkersuisut oqaaseqaataannik pissarsiniarsimavoq. Naalakkersuisut akissummenni oqaatigaat Naalakkersuisut inatsisissatut siunnersummik suliaqarnerminni UPA2011/38-ip ("Kalaallit Nunaanni aaqqissuuseqqinnerup kingorna kommuniusimasut tamarmik minnepaamik qinikkamik ataatsimik nunami sumiiffiup sinniisaatut kommunalbestyrelsini ilaasortaatitaqarnissaat anguniarlugu apeqquteqaat aallaavigalugu oqallinnissamik siunnersuut") suliarineqarnerani Inatsisartut tunngaviusumik isummernerat malissimagaat.

Tassunga atatillugu Inatsisinut Ataatsimiititaliap oqaatigissavaa apeqquteqaat aallaavigalugu oqallinnermi Suleriaatsimi § 36, imm. 4 malillugu inatsisartut oqaaseqaateqarneratigut tunngaviusumik aalajangertoqanngimmat. Apeqqutaat aallaavigalugu oqallinnerulli taamaattoq takutippaa Inatsisartuni amerlanerussuteqartut sumiiffinit sinniisuutitaqarnermik aaqqissuussinerup ingerlatiinnarneqarnissa kissaatigigaat, kiisalu Nunami namminermi pissutsinut, Pinngortitamut Avatangiisinullu Naalakkersuisup neriorsuutigalugu kommuninut qinersineq pillugu inatsisissap nutaap suliarineqarnerani isummat partit saqqummiussaat isiginiarneqarumaartut. Neriorsuut tamanna Naalakkersuisut naammassivaat.

Ataatsimiititaliap oqaatigissavaa sumiiffiit sinniisuutitaqarnerannik aaqqissuussineq eqquunneqarmat kommunit kattussorneqarneranni ikaarsaariarnermut aaqqissuussinermut atatillugu Aaqqissusseqqinnissaq pillugu Inatsisartut ataatsimiititaliarigallagaata taamatut kissaateqarnera tunngavigalugu.¹ Ataatsimiititaliami amerlanerussuteqartut taamanikkut isumaqarsimapput taamanikkut kommuniusimasut kommunerujussuit nutaat communalbestyrelsiini sinniisuutitaqarnissaat qularnaarneqassasoq. 2008-imi kommuninut qinersinissamut atuuttumik piffissami ikaarsaariarfimmuinnaanngitsoq ataavartumilli.

Sumiiffiit sinniisuutitaqarnerata attatiinnarneqarnissa illersorlugu akerlilersorlugu tunngaversuisoqarsinnaavoq. Ataatsimiititaliap maluginiarsimavaa sumiiffiit sinniisuutitaqarneratigut ilaatigut qularnaarneqarsinnaammat kommunerujussuarmi najukkani ataasiakkaani pissutsinik ilisimasalinnik communalbestyrelsimi ilaasortaqarnissa aamma najukkami pineqartumi pisortatigoortunik pisoqartillugu communalbestyrelsinut sinniisaasinnaasunik. Peqatigitillugu

¹ Aaqqissusseqqinnissaq pillugu Inatsisartut Ataatsimiititaliarigallagaata UPA2007/27-imut isumaliutissiissutaa takuuk.

taamatuttaaq tunngavilersuutigineqarsinnaavoq sumiiffiit sinniisutitaqarneratigut kommunimi tamarmi innuttaasut periarfissinneqarmata kommunalbestyrelsimit ilaasortamut naminneq saaffiginninnissaminnut isumaqarunik pissutsinik iluarsiisoqartariaqartoq kommunalbestyrel-sip ilisimasariaqagaanik. Qularnanngitsumik qinersisartut tamanna orniginartinnerussavaat kommunalbestyrelsimit ilaasortanut sumiiffimmi najugaqanngitsumut sianernermut allan-nermulluunniit sanilliullugu. Taamatuttaaq tunngavilersuutigineqarsinnaavoq taamatut aaq-qissuussinikkut sumiiffiit ataasiakkaat kommunalbestyrelsimi sunniuteqarsinnaanerat qular-naartarmagu. Tunngavilersuutigineqartorli kingulleq qanoq ilumoortiginersoq aamma oqallisigineqarsinnaavoq. Aaqqissuussinikkut sumiiffiit ataasiakkaat periarfissinneqarput "uum-mammiuminnik saqqummiussinissaminnut", kisiannili tamanna qularnaarinngilaq kommunalbestyrelsimi amerlanerussuteqartunit taperserneqarnissanut. Akerlianik annilaangatigine-qarsinnaavoq aaqqissuussinikkut kommunalbestyrelsimit ilaasortat tamarmik misigisimaler-sinnaammata sumiiffiit namminneq aggerfimmik sinniisaattut, pissutsillu taamaalerpata su-miiffiit sinniisaat akuttunngitsumik ikinnerussuteqartartussaapput. Tamannarpiarlu kommu-neqarnikkut aaqqissuusseqqinneaq iluatsissappat pissutsit ilagaat aaqqissuussinermut *akerliu-sutut* oqaatigineqarsinnaasoq, tamatumani pingaaruteqarmat kommunip ataasiutut kommunimi tamarmi misigineqarnissa, taamatullu aamma kommunalbestyrelsimit ilaasortat pingitsoqaratik kommunimi *tamarmi* innuttaasut soqutigisaannik isumaginnittussatut misigisi-manissaat. Tassunga aamma ilanngunneqassaaq aaqqissuussinikkut pissutsit imatut inerneqar-sinnaammata qinigassanngortittoq ikittuinnarnik taaneqaraluarluni communalbestyrelsimit ilaasortanngornera allat qinigaanerugaluarlutik isinngitsoortut, taamatullu aamma kinguneqar-sinnaalluni communalbestyrelsimit ilaasortaatitaqarneq eqqarsaatigalugu kommunimi tamarmiusumi partiit akornanni qinersisit agguataarsimanerata ersiutaanginneranik. Tamanna innuttaasut oqartussaaqataanerat eqqarsaatigalugu ajornartorsiutitut misigineqarsinnaavoq.

Taamaalilluni sumiiffiit sinniisutitaqarnerat iluaquteqarlunilu ajoquteqarsinnaavoq, taamaa-lilluni aamma tupallaatigineqarsinnaanani kommunini Inatsisartunilu partiit akornanni apeq-qt assigiinngitsunik isumaqarfingineqarmat.

Sumiiffiit sinniisutitaqartarnerat ingerlatiinnarneqassappat taava aamma sumiiffimmit sinni-soq kommunimi sumiiffimmi allanut nuuppat qinigaanerminik annaasaqartassanersoq ilan-gullugu isummerfigineqartariaqassaaq.

Soorlu Naalakkersuisut siunnersumminkki taamak iliornissamik siunertaqartut, sumiiffiup sinniisutitaqartarneranik ingerlatsiinnarnissaq Ataatsimiititaliami amerlanerussuteqartut IA-meersut Siumumeersullu kissaatigaat. Taamaakkaluartoq sumiiffiup sinniisaata kommuneru-jussuup iluani illoqarfimmut allamut nuunnermigut ilaasortaanerminik annaasaqarnissa amer-lanerussutilinnit pineqartunit kissaatigineqanngilaq. Amerlanerussuteqartut tamanna naaper-torlugu allannguutissatut siunnersummik saqqummiussiput.

Sumiiffiup sinnisaata ingerlatinnaeqarnissaa ataatsimiititalimi ikinnerussuteqartunit Demokraatineersunit kissaatigineqanngilaq. Ikinnerussuteqartut pineqartut tamanna naapertorlugu allanngutissatut siunnersummiq saqqummiussipput, tassungalu atatillugu ikinnerussuteqartut oqaaseqaataannik imaattumik saqqummiussipput:

Qinersisartut Demokraatit isumaat malillugu, partiinik inunnilluunniit ataasiakkaanik qinersinnaassapput, kisitsinerillu naammassippata kommunalbestyrelsi tassaassaaq partiinit ataasiakkaanit qinigaanerpaanikuusut. Assersuutigalugu Kommuneqarfik Sermersumi Demokraatinik qinersisimasut amerlassutsimikkut ilaasortanut pingasunut isertitsinissamut naammappata, taava Demokraatiniit qineqquasaartut qinigaanerpaajusimasut pingasut communalbestyrelsimit ilaasortanngussapput. Tamanna inuit oqartussaaqataaneranni iliuutsitut pisusissamisornerpaatut isigaarput. Qinersivinni ilaasortat aallaavigalugit suleriaaseqaraanni, taava qinersivinni ilaasortat inissaqarnissaat peqqutaalluni, communalbestyrelsimit qinigaanerpaajunngitsut isernissaat pisinnaammat. Demokraatit isumaat malillugu tamanna inuit oqartussaaqataanerannut eqqortuliornerpaajunngilaq. Qinersivik ataatsimut isigalugu aaqqisuussinerup politikerit qinikkat eqqaasissavai, illoqarfimmit nunaqarfimmilluunniit aalajangersimasumit aallartitaannginnerannik, kisiannili kommunip tamarmiusup soqtigisai sulissutigisussaallugit aallartitaanerinik.

3.3. Najukkani siunnersuisoqatigiit.

Sumiiffimmit sinnisoqartarnermik aaqqissuussinermut taarsiullugulu najukkami siunnersuisoqatigiinnik, nunaqarfinni aqutsisut assigalugit atuuffilinnik, pilersitsisoqassasoq Qaasutsup Kommuniani communalbestyrelsip kaammattutigaa. Aammattaaq sumiiffinni ataasiakkaani siunnersuisoqatigiinnik communalbestyrelsip tungaanit pilersitsisinnaanerup periarfissaalernissaanik, taakkulu pisussaaffilerneqassasut piginnaatitaaffilerneqassasullu, ilaasortaa-sullu atuuffimminnut tunngatillugu akissarsiaqartitaanissaat Kommuneqarfik Sermersumi communalbestyrelsip kaammattutigaa.

Tamanna Kanukokamit tapaserneqarpoq. Sumiiffimmit aallartitaqarnermik aaqqissuussinerup kommuniusimasunut taamaallaat atuutsinneqarnera, nunaqarfiiillu ataatsimoorussamik aqutsisuinut tunngatillugu aaqqissuussamik assingusumik pilersitsisoqannginnera, aalajanger-simarpalaanngitsutut Kanukokamit tikkuarneqarpoq. Nunaqarfiiit ataasiakkaat taamaalillutik nunaqarfiiit ataatsimoorussamik aqutsisuinut sumiiffimmit aallartitaqarnissaq isumannaerneqanngilaq. Kanukokap taamatuttaaq uparuarpaa killormut iliornertut isikkoqarsinnaammat nunatsinni illoqarfiiit nunaqarfittulli sunniuteqarsinnaatinneqassanngippata.

Kaammattuutit pineqartut akuereratarnissaannut, aqutsinermut inatsimmik akissarsiaqarnerlu pillugu nalunaarummik allannguinissaq pisariaqassaaq.

Kommunini iluarsartusseqqinnissamut atatillugu najukkani ataasiakkaani siunnersuisoqati-
giinnik pilersitsinissaq Inatsisartunit isumaqatigiittunit 2007-imi itigartitsissutigineqarpoq
(UKA 2007/50). Siunnersummiq suliarinninnermi Inatsisartut nangaassuteqarnerannut, pis-
sutsit assiginngitsut pissutaaqataapput:

- Siunnersuutip nassataraa, Kommunalbestyrelsit killilerneqanngitsumik amerlassusi-
linnik najukkani ataasiakkaani siunnersuisoqatigiinnik pilersitsisinnaanissamut, ilaa-
sortallu akissarsiaqartissallugit pisinnaatitaaffeqalissapput.
- Siunnersuutip nassataraa, kommunalbestyrelsit nammineerlutik najukkani ataasiak-
kaani siunnersuisoqatigiinni ilaasortaasussanik toqqaasinnaalernerat. Taamaalillunilu
najukkani siunnersuisoqatigiit katitigaanerannik aalajangiiniarnermi najukkani qiner-
sisitsinissaq pisariaqarani.
- Kommunalbestyrelimut ilaasortat, kommunalbestyrelsip nammineq pilersitaanni
namminerlu ilaasortanik inuttalissallugit periarfissaqarfigisaanni, najukkani ataasiak-
kaani siunnersuisoqatigiinni ilaasortaanermi akissarsiaqartitaaneq siunnersummi
mattunneqanngilaq.
- Kommunini aqtsinermut inatsimmi siunnersuisopqatigiinnik nævninillu aamma
najukkami siunnersuisoqatigiinnik aalaajangiisartutullu ataatsimiititalianik pilersitsi-
nissaq akissarsiaqanngitsunilli siusinnerusukkullui tunngavissaqareerpoq.
- Siunnersuut allaffissornikkut ileqqaarnissamik, qinikkanullu aningaasartuutinik ileq-
qaarnissaq ilanngullugu, kommunini iluarsartusseqqinnermi isumannaarinninnissa-
mut tunngaviusumik siunertaanut naapertuutinngillat.
- Aqqissuussaanermut Ataatsimiititaliap nunaqarfiiq aqutsisuunik atorunnaarsitsinisi-
samik siunnersuutaanut ataqtatigiisillugu siunnersuut isigineqassaaq.

Inatsisinut Ataatsimiititaliap Naalakkersuisut qinnuigisimavaat qulaani allassimasut oqaase-
qaateqaqqullugit. Naalakkersuisut akipput Naalakkersuisut pissutsit Inatsisartuni 2007-imi
saqqummiunneqartut tunngaviatigut isumaqatigigaat. Tamatuma kingorna Naalakkersuisut
kommuninik Kanukokamillu oqaloqateqartarnerminni immikkut ataatsimiititalianut aqtsinermut
inatsimmi § 31, imm. 3 naapertorlugu kommunalbestyrelsip pilersissinnaasaannut ilaas-
sortanik kommunit aningaasarsiaqartitsisinnaanerannut periarfissap nalilorsornissaanut pia-
reersimallutik nalunaarsimapput.

Inatsisinut Ataatsimiititaliap Naalakkersuisut qinnuigisimavaat ilisimatitsissutigeqqullugu
Naalakkersuisut sutigut periarfissaqarsorineraat kommunini qinikkanut aningaasartuutit ta-
marmiusut qaffanneqannginnissaannut, aalajangerneqassagaluarpat kommunalbestyrelsit pe-
riarfissaqassasut najukkani siunnersuisoqatigiinnik assigisaannilluunniit aningaasarsiaqarsin-
naasunik ilaasortalinnik pilersitsisinnaassasut.

Apeqqummut atatillugu oqaatigineqassaaq 2013-imut aningaasanut inatsisissatut siunnersuutip Aningaasaqarnermut Ataatsimiititaliami suliarineqarneranut atugassatut akissumminni Naalakkersuisut ilisimatitsissutigimmassuk kommuneqarnikkut iluarsaaqqinnej (suli) siuntertarineqartutut allaffissornikkut sipaaruteqarnerik kinguneqarsimanngitsoq, akerlianillu kommunit allaffissornermut aningaasartuutaat annertuseriarsimasut. Kommunit kattussuutninginneranni ukiumi kingullermi kommunit allaffissornermut aningaasartuutaat katillugit 505 mio. kr.-isimapput. 2012-imut allaffissornermut aningaasartuutissatut missingersuutigineqartut 550 mio. kr.-iupput.

Naalakkersuisut akipput najukkani siunnersuisoqatigiinnut assigisaannulluunniit ilaasortaanermet aningaasarsiat qummut killilerneqarsinnaanerat isumaliutigineqarsinnaasoq. Taamaaliortoqassappat aqutsinermut inatsisit aningaasarsiaqartitsinermullu nalunaarut allanngortittariaqassapput.

Naalakkersuisut taamatuttaaq periarfissatut tikkuarpaat aningaasarsiaqartitsineq iluarsineqarsinnaasoq qinikkanut aningaasartuutigineqarsinnaasut ataatsimut qummut killilerneqarnerisigut, najukkani siunnersuisoqatigiinnut assigisaannullu ilaasortaanermet aningaasarsiaqartineqarneq pisassalluni kommunalbestyrelsimum kommuninilu ataatsimiititalianut allanut ilaasortat aningaasarsiaasa iluarsineqartarnerisigut.

Periarfissaq Naalakkersuisut akissumminni eqqaanngisaat tassaavoq communalbestyrelsimum ilaasortat ikilisinneqarsinnaanerat.

Najukkani siunnersuisoqatigiinnit pilersitsisoqarsinnaanissaanik siunnersummik kingullermik Inatsisartunut saqqummiussisoqarpoq 2008-mi ukiakkut ataatsimiinnermut 2008². Aaq-qissusseqqinnissaq pillugu Inatsisartut ataatsimiititaliarigallagaata taamanikkut tamanna pillugu ilaatigut ima oqaaseqarpoq:

"UKA 2007/30-ip aamma UKA 2007/50-ip suliarineqarneranni kommunerujussuanngortussani communalbestyrelsini kommunit maanna atuuttut ilaasortaqarnissaat qulakkeerneqassasoq ataatsimiititaliap isumaqatigiittup kissaatigivaa, aamma nunaqarfinni aqutsisut ilaasortai affaannanngorlugilluunniit attatiinnarnissaat (soorlu "Nu-naqarfinni ataatsimut aqutsisunik" pilersitsinikkut, taakku tassaassapput sumiiffiup iluani nunaqarfinni marlunni amerlanerusuniluunniit nunaqarfinni siulersuisut).

Naalakkersuisut taama siunertaqarsimanngikkaluarput, taamaattorli Ataatsimiititaliap inassuteqataanut Inatsisartut akuersaarput.

² UKA 2008/61: Kommunit aqunneqarnerat pillugu Inatsisartut inatsisissaannut siunnersuut

Nunaqarfinni aqutsisut attatiinnarneqarnerisigut kommunillu atuuttut kommunalbestyrelsinnngortussanilu ilaasortaataqarnissaat qulakkeerneratigut sumiiffinni siunnersuisoqatigiinnik pilersitsinissamut tunngavissaqanngitsoq Ataatsimiititaliaq isumaqarpoq, Naalakkersuisullu tamanna pillugu siunnersuutaata itigartinneqarnis-saa innersuussutigalugu.

Taamaalillutik Ataatsimiititaliap isumaqatigiittup sumiiffinni inuit qinigaasa ullumikkutut ilisimasatta ikililerlugit attatiinnarneqarnissaat piumasarivaa. Taamaalil-luni inuit qinigaasa ataatsimut amerlassusaasa ikilernerisigut kommunit pillugit aaqqissuusseqqinnermi siunertaasut pingarnerpaat ilaat sipaarniutit periarfissa-lissapput.

Taamaattorli inatsisisstatut siunnersuummi maanna saqqummiunneqartumi kapitali ataaseq (Kapitali 7) communalbestyrelsit tunngaviatigut killeqanngitsumik amerlas-susilinnik sumiiffinni siunnersuisoqatigiinnik pilersitsisinnaanissaannut periarfissii-von, taakkulu tamarmik tallimanik akissarsiaqartitaasunik ilaasortaqassapput. Sumiiffinni siunnersuisoqatigiit tamakku “sumiiffinni suliassaatit” pillugit aalajangii-sinnaallutillu sumiiffinni pissutsit pillugit communalbestyrelsimit oqaaseqaateqarsi-naallutillu innersuussuteqarsinnaapput.

Nunaqarfinni siulersuisut attatiinnarneqarnerisigut kommunillu pioreersut kommu-nalbestyrelsissani sinniisoqarsoqarnissaasa isumannaarneqarnerisigut sumiiffinni siunnersuisoqatigiit pilersinneqarnissaannut pisarialimmik tunngavissamik suli nas-saassaqanngitsoq Ataatsimiititaliaq isumaqarpoq.

Tamatumanittaaq sumiiffinni soqtigisat pillugit peqataatitsinissamut communalbestyrelsit allatigut – akikinnerusumillu – periarfissaqarnerat taasariaqarpoq.

Sumiiffinni siunnersuisoqatigiit pilersinneqarnissaannut periarfissaq killilerneqara-luarpalluunniit kommunini maanna piusuni tamani sumiiffinni siunnersuisoqatigiinnik ataasiinnarmik pilersitsisoqarsinnaalerluni, kajumissaatisianut aningaasartuu-tissat taakkunaat ataatsimut 6,5 mio. kr.-t missaanni naleqassapput. Tassunga siunner-suisoqatigiit allaffissornikkut kiffartunneqarnerannut aningaasartuutit, ini-nut aamma qarasaasiaqarnermut assigisaannullu aningaasartuutit ilanngunneqas-sapput.

Kommuninik aaqqissuusseqqinnermi sipaarutissatut siunniunneqartut aalajangiusi-maannarneqarnissaat Ataatsimiititaliamit kissaatigineqarpoq.

Taamaattumik Naalakkersuisut allannguutissatut siunnersuummik saqqummiussissasut Ataatsimiititaliap isumaqatigiittup kaammattuutigaa, taamaalillutik kommunalbestyrelsit sumiiffinni siunnersuisoqatigiinnik pilersitsinissamut periarfissamik tunineqannigillat.”

Naalakkersuisut 2013-imi upernaakkut ataatsimiinnermi kommuninik aqtsineq pillugu Inatsisartut inatsisaannik allannguutissatut siunnersuummik saqqummiussinissartik siunertarigaat, Naalakkersuisut paassisutissiissutiginikuuat. Naalakkersuisut inatsisissatut siunnersuummik qanoq ilusiliinissamik isumaliutiminnut Sumiiffiit Siunnersuisoqatigiivnik pilersitsisinnaanissamik kissaatit ilanngutissaagaat, Inatsisintut Ataatsimiititaliamit Naalakkersuisut kaammattorneqarput, kiisalu – kissaatit pineqartut Naalakkersuisunit taperserneqarnissaat piareersimaffigineqarpat – qanoq Sumiiffiit Siunnersuisoqatigiivnik aaqqissuussinerup pilersinneqaratarsinnaasup pitsaanerpaamik ilusilerneqarnissaa aningaasalorsorneqarnissaalu isummersorflegequllugu.

3.4. Innuttaasut nunatta avataani najugaqarallartut qinersisinnaatitaanerat qinigaasin-naanerallu.

Naalakkersuisut saqqummiussumminni ilaatigut oqaatigaat:

“Siunnersuut naapertorlugu inuit aalajangersimanerusut - ilinniartut, napparsi-mavinni uninngasut il.il. - nunatta avataani najugaqalerallarsimasut taakkulu aap-parisaat kommunalbestyrelsinut, nunaqarfinni aqutsisunut aamma ilagiit sinnisaan-nut qinersinerni taasisinnaanissannut periarfissinneqassallutik.

Tusarniaanerup kingorna apeqqutigineqarpoq nalinginnaasumik tamat oqartussaa-qataaneranni tunngaviusut akuerisaasut naapertorlugit aamma qulakkeerneqassa-soq taakkua inuit pineqartut qinersinermut qinigassanngortissinnaanissaat. Inatsi-sartuni 2010-mi suliarinninnermi apeqqut tamanna qaquinneqanngilaq. Siunnersuut taama isikkoqartillugu inuit taakku § 2-mi pineqartut taamaallaat taasisinnaanissamut periarfissinneqassapput kisiannili qinersinermut qinigassanngortissinnaassan-atik. Tamat oqartussaaqataaneranni tunngaviusut nalinginnaasumik akuerisaavoq qin-ersinermut qinersisinnaatitaagaanni aamma qinersinermut qinigassan-ngortissinnaanissaq.”

Inatsisintut Ataatsimiititaliap tassunga atatillugu oqaatigissavaa UPA2010/141 (Kommunalbestyrelsinut, nunaqarfinni aqutsisunut ilagiillu sinnisaannut qinersisarnerit pillugit inatsit pillugu Naalakkersuisut allannguutissamik siunnersuuteqaqqullugit peqquneqarnissaannik Inat-sisartut aalajangiiffigisassaattut siunnersuut, taamaalilluni § 2 Inatsisartut inatsisaanni Kalaallit Nunaanni Inatsisartunut qinersisarneq pillugu inatsisip assinganik aalajangersagaqa-leqquullugu) pillugu ataatsimiititaliap isumaliutissiissutaani aallaviulluinnarsimammat kom-munimut qinigassanngortissinnaanerup kommunimut qinersisinnaatitaaneq malissagaa, taa-

maattumillu Inatsisartunut qinersisarneq pillugu inatsisartut inatsisaanni § 2-mut naapertuutumik aalajangersakkamik ilanngussineq innuttaasut nunatta avataani najugaqarallartut eqqarsaatigalugit taasisinnaatitsiliinnarani kisianni aamma qinigaatitsisinnaalissasoq pissutsit aalajangersakkamut ilaatinneqartut pissutigalugit.

Taamatut eqqarsarnartoqartitsigaluarluni ataatsimiititaliap siunnersuutip akuersissutigineqarnissaa inassutigaa Inatsisartullu taamatut inassuteqarneq malillugu. UPA 2010/141-mut isumaliutissiissut isumaliutissiissummut matumunnga ilanngussatut 3-tut ilanngunneqarpoq.

Tamanna tunngavigalugu Inatsisinut Ataatsimiititaliap isumaqatigiittup allannguutissatut siunnersuut saqqummiuppa, taamaalilluni § 5-imi qinigaasinnaaneq pillugu aalajangersakkamut inuit § 2 naapertorlugu qinersisinnaatitaasut aamma ilaasussanngorlugit.

Inatsisinut Ataatsimiititaliap inassuteqaataa

Ataatsimiititaliap isumaqatigiittup allannguutissatut siunnersuut saqqummiuppa. Tama-tuma saniatigut amerlanerussuteqartut IA-meersut aamma Siumumeersut kiisalu ikinnerussuteqartut Demokraatineersut tapiliussamik allannguutissatut siunnersuutit tamarmik im-mikkut saqqummiuppaat.

Taamak oqaaseqarluni Inatsisinut Ataatsimiititaliap siunnersuut aappassaaniigassanngortippaa.

Isak Hammond,

Siulittaasoq

Inuit Ataqatigiit

Justus Hansen

Demokraatit

Doris Jakobsen

Siumut

Harald Bianco

Inuit Ataqatigiit

Kristian Jeremiassen

Siumut